

Wilfried hett Geburtsdag

Wilfried is uns Naber. He hett Geburtsdag hatt. 47 Jahr is he wormn.

Over Dag hebben se bi't Arbeit bi'nanner seten, un he hett Brötchen utgeven. Un tegen Avend sünd wi noch eben rover gahn.

Wilfried hett sien neje Jogging-Anzug an - ok wenn he anners lever in oll Kleer lopen mag. Man disse Dag, de is ja wat Besünners, sien Geburtsdag.

Un nu komen ok noch all de annern, Hans-Jürgen un Helga, Wilfrieds Süster mit Kinner un sien Unkel un Tant.

Un wi sitten in't Wintergorden bi'nanner un proten un drinken Beer. 'n heel normal Geburtsdag.

Ja. Un doch neet.

Uns Naber Wilfried is behinnert.

He wohnt noch bi sien Mama un Papa, bi Brunke un Marie.

Domals, vör 47 Jahr, as he geborn is, do hett dat so lang anholn - un dor is wat van törügg bleven.

Wilfried hett nooit proten lehrt.

He bruukt Hülp bi all dat, wat uns so licht fallt.

Man he kann doch wat: He kann Rad fohrn, un he mag to geern mit sien Zug spölen.

Un wat freut he sük, wenn he mit Brunke un Marie na Börkum fohren kann. Dor hebben se 'n Wohnwagen stahn un maken faker 'n paar Daag Urlaub. Schippen un Water, dor kann Wilfried heel neet genug van kriegen.

Man wenn he Geburtsdag hett, denn mutt he ja in Huus wesen.



Denn komen se ja all - denn kriggt he Visit.

Denn kummt namiddags sogor de Bullifahrer van d' Lebenshilfe mit rin to Tee un Kook.

Mennigeen mag woll seggen: Ochher, musst eben kieken, de is behinnert. Kann heel neet proten. De Ollen sünd to beduren.

So een kann sük mit 47 Johr noch neet alleen helpen.

Well so wat seggt, de weet neet, wat Wilfried för sien Ollen bedüden deit.

Ik freu mi, dat wi Wilfrieds Geburtsdag ok dit Johr weer fiert hebben.

Dormit seggen wi: Dat is mooi, dat du dor büst - so as du büst. In Gotts Naam:

Minschen as Wilfried sall dat good gahn - an hör Geburtsdag un an all de anner Dagen ok.